



Tužilaštvo - Tužiteljstvo Bosne i Hercegovine
Тужилаштво Босне и Херцеговине

Broj: T20 0 KTA 0020808 21
Sarajevo, 07.08.2025.godine

Na osnovu člana 35. stav 2. tačka e) i člana 216. stav 3. ZKP-u BiH donosim sljedeću:

NAREDBU
o nesprovođenju istrage

Neće se provoditi istraga na osnovu krivičnih prijava „(...)“ i „(...)“, podnesenih putem službene e-mail adrese Tužilaštva BiH, i krivične prijave „(...)“, podnesene putem Državne agencije za istrage i zaštitu BiH, protiv R.V. jer ne postoje osnovi sumnje da je prijavljena osoba počinila krivično djelo.

Образложење

Tužilaštvo BiH zaprimilo je putem službenog e-maila krivične prijave „(...)“ od dana 28.07.2021. godine i „(...)“ od dana 04.08.2021. godine i putem Državne agencije za istrage i zaštitu BiH krivičnu prijavu „(...)“ od 28.06.2021. godine, koji prijavljuju da R.V. putem svojih Twitter objava negira zločin genocida. O istom događaju objavljeni su i novinski članci na ... internet portalu ...

Postupajući po podnijetim prijavama Tužilaštvo BiH je Naredbom od 07.10.2024. godine naložilo vršenje uviđaja u cilju dokumentovanja spornih Twitter objava na nalogu pod nazivom „(...)“ na toj društvenoj mreži. Izvještajem Državne agencije za istrage i zaštitu BiH broj od 16.10.2024. godine utvrđeno je da predmetni uviđaj nije bilo moguće izvršiti jer je profil „(...)“ privremeno blokiran od strane društvene mreže „Twitter“, odnosno aktuelnog naziva mreže „X“, zbog čega se nije moglo pristupiti istom u cilju pronalaženja objava koje su prijavitelji naveli u svojim prijavama. Takođe, pretragom je utvrđeno da su i putem poveznice <https> linka na ... internet portalu ... izvorno preuzete objave u okviru vršenja uviđaja bile nedostupne iz kako je navedeno razloga što „Twitter suspenduje naloge koji krše pravila te društvene mreže“.

Tužilaštvo BiH je nadalje putem Zamolnice za pružanje međunarodne pravne pomoći od 11.06.2025. godine od Ministarstva pravde SAD, Krivičnog Odjela, kancelarije za međunarodne odnose, tražilo da od kompanije „Twitter“, odnosno „X“. Inc sa sjedištem u San Francisku, pribavi i ovom Tužilaštvu dostavi sporne objave koje su navedene Zamolnici i u vidu Screen shot materijala dostavljene uz istu, a sve za vremenski preiod od 01.06.2021. godine do 29.04.2022. godine, te je dostavljen i izvod iz Krivičnog zakona BiH, član 145a. KZ BiH.

Riječ je o više objava koje mogu predstavljati govor mržnje iz člana 145.a stav 3. KZ BiH.

Dopisom Ministarstva pravde BiH broj ... od 11.07.2025. godine Tužilaštvo BiH je obaviješteno od strane Ministarstva pravde SAD, Krivičnog Odjela, kancelarije za međunarodne odnose da isto nije moglo udovoljiti Zamolnici za međunarodnu pravnu pomoć ovog Tužilaštva jer je zaključeno da sporno izražavanje, navedeno u Zamolnici, predstavlja slobodu govora zaštićenu Prvim Amandmanom Ustava SAD-a, koji obezbjeđuje slobodu izražavanja i zabranjuje krivično procesuiranje ovakvog govora, osim usko definisanih slučajeva, navodeći da osnovna zaštita obuhvata i govor koji može biti shvaćen kao kontrovrezan, nepristojan i uvredljiv.

Dakle, kako u konkretnom slučaju nije bilo moguće izvršiti uvidaj na samom „Twitter“/“X“ nalogu pod nazivom „(...)“ i time i službeno zadokumentovati sporne objave jer je isti nalog blokiran od strane društvene mreže „Twitter“/“X“, te kako se iste informacije nisu mogle pribaviti ni putem instituta međunarodne pravne pomoći jer su iste od strane nadležnog organa zamoljene države ocijenjene kao sloboda govora, koje i u smislu pojedinih kontrovreznih, nepristojnih i uvredljivih sadržaja same po sebi nisu takve sadržine da bi obuhvatale one usko definisane slučajeve u kojima se odstupa od principa slobode izražavanja, a u korist zaštite ljudskih prava i osnovnih sloboda, koje bi rezultirale udovoljavanju Zamolnici za pružanje međunarodne pravne pomoći i dostavljanju sporne dokumentacije, donijeta je odluka kao u Dispozotivu ovog akta.

O nesprovođenju istrage, kao i o razlozima za donošenje Naredbe o nesprovođenju istrage, Tužilaštvo BiH će, shodno članu 216. stav 4. Zakona o krivičnom postupku BiH obavijestiti Državnu agenciju za istrage i zaštitu BiH i druge podnosiocima prijave, a drugi podnosioci, osim Agencije, imaju pravo podnošenja pritužbe Kabinetu glavnog tužioca u roku od osam (8) dana.

**TUŽILAC
TUŽILAŠTVA BIH**